

AKASHVANI AIZAWL
REGIONAL NEWS BULLETIN
HEADLINES (EVENING)

Date – 26/08/2025

Time - 18:30 -18:40Hrs

- Mizoram hmun kilkhawr zawka zirlai leh hna zawng laiten online exam neih dawna network lama harsatna an tawh thin tihnep a nih theih nan tunhmaa BSNL Exchange chu Online Exam cum Skill Training Centre-a leh remtih a ni.
- Home Minister Pu K Sapdangan Thenzawl Police Training School ah tunhnaia Constable lak tharte training hawna a hmanpui .
- September ni 13-a Sairang leh Bairabi inkar Rel kawng hawn tur chungchangah Mizoram sorkar chu Railway Board thuneitute nen inkawmin a inbuatsaih mek.
- Prime minister Narendra Modia chuan vawiin khan ramchhunga siam electric lirthei 'E-Vitara' siam thar a vailiam.

<><><>

CM

Chief Minister Pu Lalduhoma leh BSNL NE 1 Chief General Manager Pi Daily Giri vawiina inkawm chuan Mizoram hmun kilkhawr zawka zirlai leh hna zawng laiten online exam neih dawna network lama harsatna an tawh thin tihnep a nih theih nan tunhmaa BSNL Exchange ni thinte Online Exam cum Skill Training Centre-a leh an remti.

Pi Daily Giri hi kumin July ni 10-a Chief Minister leh BSNL Chairman & Managing Director, Pu A. Robert J. Ravi te New Delhi-a an inkawmna bawhzuia lo kal a ni a. Mizoram hmun kilkhawr zawka zirlai leh hna zawng laiten online exam an neih dawnin Aizawl leh district khawpui an pan thin a. He harsatna hi tihnep a nih theih nan hmalak remtiin Mizoram hmun kilkhawr zawkten internet signal tha an neih ve theih nan Tower enge maw zat phun belh ni se an ti bawk. Tunah hian BSNL hian Mizoram tan Tower 53 phun belh tur an nei sa a. A phunna tur hmun hi sorkar ngaihpawimawh hmasak hmunah te phun phawt tur niin, a tul angin tower hi dil belh zel theih a ni.

India ram khawpui danga BSNL rama Mizoram House emaw Hostel, neitu nihna intawm (partnership pattern) hmanga din chungchang pawh an sawi a. A kalpui dan tur hi GAD lamin lo duang se, BSNL nena inbe zel chung kalpui tur a ni ang.

Mizoram rel kawng leh rel station tharte tana mobile signal tha chhawpsak chungchang pawh an sawi a. Pi Daily Giri hian hma an lak mek thu Chief Minister hi a hrilh a ni.

<><><>

ASSEMBLY SESSION

Ni hnih awh tur Mizoram Legislative Assembly fur thutkhawm naktuka tan tur a ngaihtuah turin dan thar siam tur pahnih leh dan dinglai siamthat tur pahnih a lut tawha.

Assembly Secretariat atanga thudawn danin, sorkar dan siam tur thar hi Urban Development & Poverty Alleviation (UD&PA) Department atangin The Mizoram Local Body Ombudsman Bill 2025 leh Social Welfare Department atangin kutdawn khapna dan siam tur duan - The Mizoram Prohibition of Beggary Bill, 2025 bakah The Mizoram private placement agency (amendment) bill, 2025 te chu thehluh a ni tawh a. Hei bakah hian Land Revenue & Settlement (LR&S) Department atangin dan ding lai siamthat rawtna The Mizoram Land Revenue (Amendment) Bill, 2025 leh The Mizoram private placement agency (amendment) bill, 2025 chu an dawng tawh bawk. Official Resolution pakhat a lut tawh a, hei hi Environment, Forests & Climate Change (EF&CC) Department atanga lut a ni a. Hei bakah hian assembly inkhawma tawngka a chhan chi (starred question) 350 leh ziaka chhan chi (unstarred question) 124 a lut tawh bawk a ni. Hei bakah hian Bill pakhat lut Speaker-in a la admit loh a awm a, a admit chuan a vaiin Bill 5 a lut dawn a ni.

Tun tum assembly fur inkhawm hi Assembly kal mek 9-na a inkhawm vawi 5-na tur a ni dawn a. Assembly speaker Pu Lalbiakzama hova business advisory committee (BAC) thukhawm chuan inkhawm hi ni 2 chhung, August ni 27 leh ni 28 ni turin an rel a. Session tan ni ah hian Dampa bialtu MLA Pu Lalrintluanga Sailo sunna hun hman a ni ang.

<><><>

HOME MINISTER

Home Minister Pu K Sapdangan Thenzawl Police Training School ah tunhnaia Constable lak tharte training hawnna a hmanpui a. Supply Minister Pu B Lalchhanzova chuan Home Minister hi a tawiawm a ni.

He hunah hian thusawiin Home Minister chuan tun tuma constable lak thar te chu khirh leh fimkhur taka lak an ni a, thlan satliah an ni lo a ti a, Mizoram Police-in bung thar an kai a ni, a ti.

Home Minister chuan Excise, YMA leh Police te tanghoin drugs leh ngawlvei do beihpui thlak an tum thu a sawi a. Drugs tawlhru te mai bakah ngawlvei ten rukruk leh pawl dang an khawih thin avangin nun an ti ralti a, do a ngai a ni, a ti. Kuhva tawlhruk nasa leh zuala an do thu te, checkgate-a a pawnga puia pawisa khawn tihtawp a nih thu te leh Police inenkawlna kawngah hmasawwna hmel an hmuh hrang hrangte he hunah hian a sawi bawk.

He hun hi Supply Minister Pu B Lalchhanzova pawhin a hmanpui a, DGP Pu Sharad Agarwal a tarlan danin tun tum hi Mizorama kum 10 chhunga a ruala police lak hnem ber tum a ni, a ti a. Constable Basic Training hi batch 70-na an ni a, an vaiin constable 277 an ni.

Heng Constable lak thar te hi Aizawl District atangin 138, Lunglei District atangin 24, Serchhip District atangin 21, Champhai District atangin 23, Mamit District atangin 12, Kolasib District atangin 19, Hnahthial District atangin 6, Saitual District atangin 12, Siaha District atangin 4, Khawzawl District atangin 5, Lawngtlai District atangin 3 an ni a. An zingah hian hmeichhia 26 an tel a ni.

<><><>

LADC EM SWEARING IN

Lai Autonomous District Council, United Democratic Alliance Sorkar a Executive Member atan a ruat mi 9 te chu vawiin khan Additional DC, Lawngtlai Pu David Lalrinawma'n, LADC Hall ah rinawmna a tiamtir.

Executive Member pakua te hi Pu.Sanghuliana Mualchin, Pu C. Rongura, Pu C. Lalsawmzuala, Pu Andrew Laltlanzara, Pu Lalropuia Chinzah , Pu .L. Daniala, Pu

C. Hrangthianga, Pu .HC Lalthawmliana leh Pu .H. Lalmuansanga te niin, CEM Pu N.Zangura chuan vawiin a Executive lakluhna ah hian amah CEM leh Executive Member te hna chanpual tur a puang nghal a, Executive Member te hian an room an luah nghal a ni.

Kan corr report lo ngaithla ang.

Executive Member lakluhna ah hian CEM Pu N.Zangura chuan, 11th LADC Term ah Sorkar kal mumallo a nasat vangin mipui leh hnathawktute pawn an tuar nasa tih sawiin, mirinawmte, thlemna hrang hrang hnawl ngamte vangin Sorkar thar a piangta chu thil lawmawm tak a ni a ti a, UDA Sorkar chuan thuneihna leh rorelna khairual kalpui a tum tih sawiin, mimal ngaihda leh duhdan in hmun a chan a rem dawnlo a ti a, Executive Member tharte pawh mahni thawhpuite zai ngaithiam turin a chah a ni.

He huna tarlan a ni danin Pu C.Lalmuanthanga chu Vice Chairman, Planning and Development Committee atan ruat a ni a, Pu BN Thangpuia chu Adviser to CEM atan a ruat anih bakah Pu Tuturu Singh chu Deputy Chief Whip atan a ruat a ni a, Pu Lalthanmawia Colney chu Chairman Town Committee atan ruat a ni bawk.

<><><>

ONLINE GAMING

Mizoramah Online Games lama inbumna a hluar chho hle a, heng zingah hian Mobile Legends leh PUBG ah te inbumna a tam zual tih Mizoram Cyber Crime Police ten an sawi.

Akashvani Aizawl zawhna chhangin, Mizoram Cyber Crime Police hotute chuan online games hmanga inbumna thubuai chu kum 2023 atang khan Mizoramah awm chho tanin, kum 2024 ah chuan a hluar chho tawh hle an ti a, nitin thubuai lut ziah ang a nih thu an sawi a, Mobile Legends leh PUBG te chu inbumna tam zualna a ni tih sawiin, an inbum dan tlangpui chu PUBG leh Mobile Legends account hralh leh inleisak chungchangah niin Mizo leh Mizo bakah khawvel ram hrang hrang atang pawhin a awm thin an ti a, Mizo leh Mizo inbumte chu an chhuichhuak thei mai a, ram dang atanga bum tawh te chu chhuichhuah sak a har tawh thin tih an sawi a ni.

Cyber Crime Police te chuan tunhnaiah naupang zinga online games khel thin te chuan an games tih thatna atan an nu leh pa, pi leh pute hriatpui lovin an Gpay leh bank account hmangin pawisa tam tak lo hman sak thin an awm thu sawiin hetiang kawngah hian nu leh pa te fimkhur a tul thu an sawi bawk.

<><><>

SAIRANG BAIRABI RAILWAY

September ni 13-a Sairang leh Bairabi inkar Rel kawng hawn tur chungchangah Mizoram sorkar chu Railway Board thuneitute nen inkawmin a inbuatsaih mek a, rel lo lut tur hian hmasawnna nasa taka thlen dawn nia an ngaih avangin Mizo mipuite chuan an nghakhlel tawh hle tih an sawi.

Rel kawng hawn tur chungchangah hian Chief Minister Pu Lalduhoma chuan Railway Board Chairman leh CEO, Pu Satish Kumar chu Inrinni khan a chenna inah kawmin inbuatsaihna hrang hrang an sawi dun a, Chief Minister chuan Railway lamin National Highway atanga rel kawng panna kawng an laih leivungin National Highway side drain a vur avanga harsatna chungchang sawipui bawkin, Side drain te siam tha a, concrete slab tea khuh turin a hrilh a. Railway Compensation la chin fel loh an nei nia a hriat thu sawiin a rang lama chingfel turin a lo ngen a ni.

Aizawla cheng mi hrang hrang te chuan rel kawng lo lut tur chu hmasawnna rahbi lian tak a ni tih sawiin, inkalpawhna, insumdawntawnna leh khualzin hipna lam a tih hmasawn dawn avangin state sum leh pai dinhmun chu nasa takin a thang dawn an ti a, hei bakah hian ram chhung hmun dangte nen inpawh lehzualna a thlen thei dawn avangin nghahlelhawm an tih thu an sawi a ni.

Akashvani palaiin Sairanga cheng mithenkhat a kawm kual te pawhin rel lo lut tur chu lawmawm an tih thu an sawi a, tunah pawh rel kawng leh station-ah inhlawhfakna tur te an neih phah tawh a, rel a lo luh hunah phei chuan chawhmeh te a tlawm tawh dawn nia an hriat avangin an phur hle tih an sawi a. Sairang Branch YMA President Pu Vanlalmuana pawhin rel lo lut tur chu Sairang mipuite an lawm hle tih sawiin, Mizoram pum huap pawhin bung thar a ni a, changkanna rahbi zawh tanna hun pawimawh tak nia an hriat thu a sawi.

Sairang YMA Adviser, Area MUP President ni bawk Pu B. Lalrinthanga pawhin rel lo lut chu thil tha tak leh ram hmasawnna turah an ngaih thu a sawi a ni.

Northeast Frontier Railway (NFR) siam Bairabi–Sairang New Line rel kawng hi kilometre 51.38 a thui a ni a, section 4-ah then darh niin, Bairabi–Hortoki km 16.72 a thui, Hortoki–Kawnpui km 9.71 a thui, Kawnpui–Mualkhang km 12.11 a thui leh Mualkhang–Sairang km 12.84 a thui a ni a, leiverh 48, lei lian 55, lei te 87, Road Over Bridges (ROBs) 5 leh Road Under Bridges (RUBs) 6 a paltlang a ni.

India ram zalen hnua a vawi khatna atan Aizawl dai, Sairang thleng tura Rel kawng siam hi Sorkar laipui hmalakna pawimawh, Act East Policy tihhlawhtlinna pakhat niin, inkalpawhna tha leh tlawm bakah khualzin hipna leh sum leh pai dinhmun tihhmasawn nana hmarchhak state te thlunzawm chu a tum ber a ni a. Mizoram hi Assam, Tripura leh Arunachal Pradesh dawtah hmarchhak state zinga khawpui (capital) leh rel in kalpawh thei 4-na a ni dawn a ni.

Puan tawh angin Prime Minister Narendra Modi an thla thar September ni 13 khian Sairang leh Bairabi inkar Rel kawng hi a rawn hawng dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime minister Narendra Modia chuan vawiin khan ramchhunga siam electric lirthei 'E-Vitara' siam thar a vailiam a, Gujarat-a battery electrodes plant a hawng bawk. Prime Minister Modia chuan ramchhung thilsiam Make in India zinkawngah bung thar kai anih thu a sawi a. Gujarat-a TDS Lithium-Ion Battery Plant bun thar chuan India leh Japan inthianthatnaah bung thar a kai tir tih a sawi a ni.

<><><>